

05 阮班的寶貝

汪采緹

讀國中了後，逐工都有濟濟的考試咧等阮，壓力實在真大。毋過我猶原足愛去學校，因為遐有我恰意的同學，會當陪我上課、陪我開講閣陪我迺迺，其中有一个眾人疼惜的寶貝，予阮班加添真濟快樂的代誌。

阮班有一个真特別的同學，伊生做圓圓，面模仔胖奶胖奶，性地溫和無啥物脾氣，看著就是真古錐的形，伊真五仁，逐家攏真疼惜伊。毋過伊得著一種愛睏症，四常上課上到一半，無張持就睏去矣，逐家三不五時就愛共伊叫精神。伊就按呢定定成做阮班講笑談的題材，伊的功課袂糗，同學滾耍笑講，是毋是周公佇夢中共你補習，無，哪有法度愈睏成績愈好咧？

會記得頭一回上英語課，伊閣無細膩睏去矣，英語老師是出名嚴格的，阮攏毋敢惹伊受氣，今這聲害矣，上課竟然睏去，真正是無愛命。當當老師足受氣共伊叫起來的時，全班恬 tsih-tsih，教室內底的空氣雄雄堅凍，逐家攏毋知欲按怎才好？這個時陣，伊竟然用一種真無辜的表情看老師，老師看一下，欲受氣也毋是、欲罵也毋是，落尾老師聽同學講伊的代誌了後，就準拄煞。

這個寶貝為著欲予家己莫睏去，嘛是步數盡展。有一

改上課，伊閣睏去矣，阮共叫醒了後，伊足自責，家己按怎閣睏去？為著欲予家己清醒，伊竟然用頭殼舂桌仔，逐家看著，驚伊受傷，趕緊共伊阻擋。閣較識的是，伊竟然想欲用齒戳仔共目睏皮掌牢咧，我真正輸伊忝忝。

閣有一改，英語老師聽阮講，伊上地理課，竟然規節課攏無睏去，就共譬相講：「是毋是地理老師較嬌，所以才無睏去咧？啊我敢有嬌？」這個時陣，伊煞歹勢甲規个面紅絳絳。毋但按呢，別人參加技藝班，毋是因為興趣，就是因為功課無夠好，伊參加技藝班，竟然是因為遐定有物件通好食。

一目瞞，國中的生活已經過一半矣，佇這個充滿升學壓力的環境內底，有這個寶貝恰阮同齊行，予阮青春的歲月，加添一寡趣味的記持。

06 跔山趣味代

吳心燕

歇睏日我定定恰阿爸、阿母做伙去跔山。會記得彼工阮的路線是對茶鉗山，盤過半屏山，落尾到黃金博物館，按算用半工較加的時間完成。

跔茶鉗山的時陣上刺激的就是愛對狹狹的石洞躑過，內底暗眠摸，每一步攏愛真細膩。阿爸先跔起去頂懸才閣共我揸起去，佳哉我跤手猛掠，敢若猴山仔真緊就躑過去矣。我的頭一下探出去，看著遠遠的山恰海，uah！有夠嬌的！阿爸講：「等咧跔出來身軀愛跔予低低，才袂予風搨落去山跤喔！」我勻勻仔跔出石洞，一陣風吹來，予我規身軀起雞母皮，想著家已倚佇遐爾懸的山頂，差一點仔軟跤，趕緊手扞石頭縫，身軀覆倚石頭，寬寬仔徙對較平坦的所在去。繼落來愛跔起去比人閣較懸的大石頂，雖然這關無蓋困難，毋過我人矮跤短，跔彼兩粒大粒石頭的時陣，毋是阿爸共我揸，就是阿母托我的尻川，有夠狼狽的啦。

行到欲起去半屏山的大片石壁彼搭，看著一隻白底烏點的流浪狗，彼隻狗敢若各樣各樣，行路跛咧跛咧，予人真毋甘。心內想講伊的主人心肝哪會遐爾雄，忒會共伊放佇荒郊野外咧？毋知佢久無食物件矣？怪奇的是塗跤有俗麪，伊攏無食，定著是無合伊的胃口。我飯丸提出來，擘

一寡予伊食，伊鼻鼻咧嘛是無食；驚伊喙焦，倒礦泉水予伊啉，伊嘛無意無意。阮煩惱伊佇遮會有危險，毋過想著拄才跔過的茶鉗山，閣看著面頭前九十度的大片石壁，若欲共這隻狗恁落山，窮實有淡薄仔困難，只好決定落山了後通報動物保育單位，予個來處理。

對半屏山落來，閣行足遠的山路才到黃金博物館，我已經忝甲會呼雞袂歎火矣！當當阮坐跔涼亭仔跤歇喘的時，一隻狗仔對阮面頭前經過，我目睷禡甲大大蕊，共阿爸翁的相片提出來看，規樣好好——無剉，是彼隻狗仔，毛草一模一樣，伊無跛跛，而且跛步輕鬆出現佇遮。我猶咧為著無法度恁伊落山心內艱苦甲，這馬才知影，原來人伊只是去山頂的地盤巡巡看看咧，是阮家已想傷濟矣啦！

07 趣味的暑期輔導課

李四

今仔日早自修結束了後，毋免班長號令，同窗的攞自動行去走廊照號碼排列，因為阮欲去法院看開庭囉！

法院誠實是一個特殊的所在，沿路行沿路講的同窗的，到法院門口煞隨恬去。逐家恬恬通過門跤口的金屬探測安檢門，老師閣一擺提醒阮入去法庭了後，袂當食物件、眊龜、坐甲無攬無拈、錄音、錄影、翕相……遮的規定。繼落來手比法庭外的電腦螢幕，共阮講這個庭當咧審理詐欺罪嫌，就使目尾愛阮入去揣位斟酌聽。

「被告李有財先生，你佇民國 110 年 5 月 18 共某乜人騙十萬箍、民國 110 年 7 月初 3 佇臺灣銀行共某乜人騙五十萬，以上攞有予電眼錄著，你敢有意見？」

「我無意見。」

「檢察官起訴你犯著刑法第三百三十九條……的詐欺罪，你敢有意見？」

「我無意見。我干焦向望大人可憐我長期無固定的頭路，攞佇咧做小工，閣有序大佗兩個讀國校的序細愛我育飼，拜託共我判較輕咧！」

我看壁堵投影顯示的資料，這位高中讀無出業的被告才三十桶歲，猶毋過看著煞比阮阿公較臭老。而且伊有十

外條做剪絡仔、恐喝、騙錢的案底，食免錢飯七八擺囉，這擺是做詐騙集團的車手予人掠著，誠實「賊性入骨，仙洗袂角」。

審理結束，被告起身，兩引邊的警察一个提手銬、一个提跤枷，共被告銬起來。逐家目睷攞瞪甲大大蕊金金看，耳仔閣聽著 khuá-la khuá-la 跤枷躡塗跤的聲。被告經過阮身軀邊的時，問警察講：「是按怎學生會使來遮？」警察講：「定著會使，這是咱臺灣的法治教育。」

這擺的體驗實在是誠珍貴，看伊一直懇求法官從輕發落，實在予人感覺真稀微，伊敢毋知「偷提袂瞞得心虛，偷掠袂瞞得天理」的道理？行轉去學校的路裡，平常時佇班上吵甲無時間、閣不時偷走學佻迤迤囡仔浪 liú-lian 的阿龍，一個人恬恬行佇上尾後，敢若是佇咧想老師講的彼句話：「頂看三，下看四；看別人，想家己。」我想伊應該是學著上濟的人！

08 用魚仔做的冊

陳雅菁

「冊」有幾若種形式，有一般的紙本冊、有紅嬰仔咧耍的布冊，嘛有現此時上時行的電子冊，毋過你敢有聽過用「魚仔」做的冊？而且這本冊毋是用看的，是用食的。

佇阮臺南，有一種真有特色的料理號做「魚冊」，伊毋但會當直接食嘛會使煮湯，食沙茶爐的時，不時都會看著伊的形影。做「魚冊」主要的原料是現流仔的狗母魚，這種魚仔肉質較幼，而且有特別的甜味，食著嘛較飽，不而過伊袂凍得，所以無法度一改做傷濟起來園。

頭家會先共狗母魚的龍骨劃起來，用湯匙仔來剷魚肉，才閣共魚肉園入去機械內底紡，為著欲予魚冊較嬌色、口感嘛較好咧，魚皮袂當園入去做伙絞，拍好的狗母魚漿較無黏性，這個時陣就愛那戛那摻鹽。魚肉撒鹽才會挽倚來做規丸，看著頭家規丸捎起來摔，這個動作閣不止仔趣味。講嘛真奇怪，魚漿煞愈摔愈飽。你掠準按呢就好勢矣，其實這只是完成做「冊皮」的材料爾爾，繼落來的才是這項料理上特別的所在。

頭家擰菜刀挖一寡仔魚漿，用刀喙佇菜砧頂面輕輕仔扣過去閣扣轉來，一片薄縞絲閣有皺痕的魚漿皮就生出來矣。人講：「看花容易，繡花難。」看頭家涼勢仔涼勢的形，

其實這項工夫是愛學足久的呢！閣來就愛用魚漿皮共豬肉餡和一枝芹菜捲起來，好食的魚冊就按呢完成囉！真正有影足厚工的。

魚冊確實是一項手路菜，伊咬落去有魚仔的鮮，嘛有豬肉的芳，因為外型恰古冊全款，攏會捲起來，所以見擺咧食這項料理的時，我攏會感覺家己足有氣質的。

頂一改歇睏日，駛車載阿爸轉去臺南看看咧，伊講想欲食倚家附近彼間汕頭「魚冊」恰「魚麵」。阮阿爸這馬喙齒無啥會哺，毋過伊真數念少年時的滋味。我擰鉸刀沓沓仔共魚冊鉸予幼幼，抹去伊面頭前，誠久無食著故鄉味的阿爸，目睷瞞瞞，勻勻仔享受這本用魚仔做的冊。啊若我咧，那斟酌看伊滿足的笑容，那欣賞阿爸這本引惹我了解人生道理的「老人冊」。